

Projektni zadatak

Napraviti klijent server sistem za analizu troškova proizvoljne kompanije. Sistem treba da podrži automatsku obradu i analizu troškova na osnovu unesenih podataka. Svi podaci se trajno čuvaju u sistemu.

Unos podataka u sistem obavlja se automatski, tako što se računi sačuvaju u foldere koje aplikacija konkurentno čita i obrađuje prilikom izvršavanja. Jedan račun se može samo jednom obraditi nakon čega se mu se mijenja naziv fajla i dodaje prefiks *done_*. Računi mogu imati različite sadržaje i formate, a svi mogući formati su dati na Moodle stranici. Sistemu su važne informacije koje se čuvaju na računu: naziv kupca, datum kupovine, šifra proizvoda, prodana količina, pojedinačna cijena svakog proizvoda, ukupna cijena za plaćanje i PDV vrijednost. Jedan račun se nalazi u jednom tekstualnom fajlu. Na jednom računu može biti više proizvoda. Folderi koje aplikacija koristi se odnose na različite poslovnice. U aplikaciji se mogu postaviti osluškivači (listeners) za svaki folder izborom odgovarajuće opcije i foldera. Ovih osluškivača može biti više za jedan folder, a mogu se uklanjati ili prikazivati u aplikaciji. Tokom rada aplikacije, svaki osluškivač provjerava sadržaj svog foldera i u zajednični log fajl upisuje sljedeće podatke: datum i vrijeme, vrsta događaja, ID osluškivača. Vrsta događaja je kreiranje ili brisanje fajla. Ukoliko se pojavi novi neobrađeni račun, osluškivač poziva modul za uvoz podataka. Moduli za uvoz podataka parsiraju račune i na osnovu sadržaja prave odgovarajuće objekte: Račun koji ima Stavke (kolekcija), Kupca (ako postoji) i Poslovnicu. Moduli koji parsiraju račune treba da koriste generičke mehanizme gdje god je to moguće i da ispunjavaju osobine polimorfnosti.

Nakon što se jedan račun učitava počinje njegova obrada. U ovoj fazi sistem serijalizuje podatke sa računa u odgovarajućim folderima čiji se nazivi nalaze u konfiguracionom fajlu aplikacije. Osim toga, izvršava se validacija svakog računa, koja podrazumijeva provjeru izračunatih vrijednosti sa računa (npr. da li je iznos*količina=ukupno...). Ukoliko se vrijednosti razlikuju sistem prijavljuje grešku i detalje upisuje u fajl sa imenom: naziv_racuna_error.txt. Obrada tog računa se u tom slučaju završava. Ukoliko je račun uspješno obrađen, podaci se skladište u sistem.

Korisnici sistema imaju sljedeće opcije:

1. Izvoz podataka u CSV fajlove:
 - Pregled svih podataka za određenog kupca
 - Pregled svih podataka za određeni proizvod
 - Pregled ukupne prodaje za određeni mjesec
2. Ručno dodavanje računa u podrazumijevanom formatu
3. Podešavanje valute aplikacije koja se čuva u konfiguracionom fajlu aplikacije
4. Upravljanje korisničkim nalogima (dodavanje, brisanje, pregled)
5. Upravljanje osluškivačima

Za upotrebu aplikacije korisnici se moraju prijaviti unošenjem korisničkog imena i lozinke. Svaki korisnik ima svoj nalog: ime, prezime, korisničko ime, lozinka i korisnička grupa. Korisničke grupe su

administrator i analitičar. Administrator ima pristup opcijama 3, 4 i 5. Analitičar ima pristup opcijama 1 i 2. Napraviti GUI aplikaciju upotrebom tehnologija koje su rađene na predmetu, pri čemu je potrebno izvršiti raslojavanje koda na sljedeći način: GUI kontroleri obrađuju samo događaje na formama, a sva logika obrade podataka i upravljanja poslovnim procesima ide u odgovarajuće servise. Servisi su klase koje imaju metode za obradu podataka koje vraćaju boolean rezultat kontroleru koji je pozvao tu metodu. Na osnovu rezultata korisniku se ispisuje poruka o uspješnoj ili neuspješnoj operaciji. Svi podaci se čuvaju na serverskoj strani i tu se nalaze mehanizmi za učitavanje i obradu računa. GUI aplikacija je na klijentskoj strani i služi samo za pozive serverskih funkcionalnosti i prikaz rezultata.